

**INTERVENSAUN VICE PRESIDENTE BANCADA DEMOCRATICO DEPUTADU ADRIANO DO
NASCIMENTO IHA LORON DARUAK, 10-12-2018, IHA DEBATE GENERALIDADE OGE 2019.**

Sua Excelensia Sr. Presidente Parlamento Nasional
Sua Excelência Sr. Primeiro Ministro,
Maluk Deputado sira, Membrus do Guvernu, no Povu Timor Leste tomak, mak ami hadomi.

“Kaer Metin Ukun Rasik An, no Harii Nasaun Husi Baze”

Iha intervensaun ida ne'e, ha'u koloka kestaun importante rua kona ba elaborasaun conseitu politiku no OGE 2019:

Primeira kestaun, mak kona ba governu nia programa prioridades prinsipais. VIII governu propoin atu dezenvolve programa prioridades prinsipais hitu hanesan: agrikultura, edukasaun, saude, infraestrutura, partikularmente be mós, saneamentu, turizmu, descentralizasaun administrativa no setór privadu (Planu Asaun Anuál pájina 4, versaun Tetum).

Hafoin analiza no tetu planu asaun anuál no orsamentu, ha'u nia pensamentu lójiku no sensibilidade política haktuir katak, VIII governu halo Planu asaun annual no orsamentu 2019 laiha koerensia no konsistensia entre planu asaun anuál no orsamentu, nune'e, OGE 2019 la refleta prioridade prinsipais hirak ne'ebé define tiha ona. Iha razaun neen mak hodi fundamenta ha'u pensamentu lójika ne'e:

1. Ba prioridade número 1 hatur iha setór agrikultura, hodi garante produsaun agríkola, seguransa alimentar no hamenus malnutrisaun, maibé governu aloka de'it orsamentu 1.5% ho total orsamentu \$27,553 milioens;
2. Ba prioridade número 2 hatur iha setór edukasaun, hodi promove edukasaun no formasaun ho kualidade ne'ebé orienta ba merkadu, maibé governu aloka de'it orsamentu 7.7% ho total orsamentu \$140,017 miloins;
3. Ba prioridade número 3 hatur iha setór saude, hodi konsolida servisu saude ho kualidade, maibé governu aloka de'it orsamentu 4.2% ho total orsamentu \$76,387 miloins;
4. Ba prioridade número 4 hatur iha infraestrutura, liuliu iha setór bé mós no saneamentu hodi hadi'a povu nia moris, maibé governu aloka de'it orsamentu 1.1% ho total orsamentu \$19,789 miloins;
5. Setór petróleu no minerais ne'ebé la tama iha prioridade 1-4 ka prioridade hitu nia laran, maibé governu aloka kedas orsamentu 21% ho total osan \$380,364 miloins;
6. Iha livru planu asaun annual hakerek prioridades prinsipais hitu, maibé iha livru panorama hakerek de'it prioridades prinsipais neen.

Bazeia ba dadus numérikus no perspetiva política ne'ebé ha'u haktuir iha leten, maka ha'u iha pergunta hitu ba Señor Primiero Ministro:

1. Tamba sá mak iha planu asaun anuál governu hakerek prioridade prinsipais hitu, maibé alokasaun orsamentu ho másimu 1 to'o 7.7% de'it?;
2. Tamba sá mak governu la hatur setór petróleu no minerais nudár prioridades principal número 1 iha orsamentu 2019, maske governu aloka orsamentu to'o 21% ho montante \$378,747 miloins?;
3. Oinsá governu atu aumenta produsaun agríkola, garante seguransa alimentar no hamenus malnutrisaun, se governu aloka de'it osan 1.5%?;
4. Sera ke governu la kohi dezenvolve setór agrikultura tamba hakarak sosa de'it fos no nesiedade bázika seluk hosi rai li'ur?;
5. Oinsá governu bele hadi'a kualidade edukasaun hodi orienta ba merkadu, se governu aloka de'it osan 7.7% ba ministériu rua no edukasaun iha municipiu 12 ho RAEOA?;
6. Oinsá governu atu resolve povu nia halerik kona bé mós no saneamentu iha uma kain ida-ida, iha eskola no fatin públiku, se guvernu aloka de'it osan 1.1% ba bé mós no saneamentu?;
7. Tamba sá mak governu hakerek prioridade prinsipais hitu iha livru planu asaun anuál, maibé iha livru panorama orsamentál hakerek de'it prioridade prinsipais neen, prioridades prinsipais ida ne'ebé mak los liu, iha livru Planu asaun annual ka iha livru panorama orsamentál?

Segunda kestaun, mak kona ba impasse politiku prolongadu iha ita nia nasaun. Ha'u nia pontu de vista haktuir katak, impasse politiku ne'e hamoris no hatur ona faktus politikus hat iha ita nia nasaun:

1. Durante kampañe no depois eleisaun, liu hosi media elektronika, media sosiál no jornál lubun ida, lider polítiku sira satan malu no hatún malu, sura sira nia kole ba funu no la valoriza malu, haketak malu tuir relijiaun, étnia no seluk-seluk tan;
2. Hafoin formasaun governu, AMP vota kontra programa no orsamentu retifikativu hosi governu Fretilin no PD;
3. VIII Governu ho Presidente da Repúblika seidaun iha intendimentu no finalizasaun kona ba kandidatu ministru lubun ida, hodi lidera ministériu ne'ebé existi tuir lei orgániku governu nian;
4. Parlamentu Nacional dala hat tui-tuir malu, blokeia vizita estadu Presidente da Repúblika ba rai li'ur, inkluidu atu hasoru Amu Papa nudár lider másimu sarani katólíka, ne'ebé Timor-Leste sai maioria katólíka 90 e tal %.

Ho faktus politikus empírikus hirak ne'e, ha'u nia perspetiva política haktuir katak, impasse polítiku ne'e mosu, tambá fatores rua: 1). Maioria versus minoria hodi satan malu no hatún malu entre AMP ho Fretilin-PD iha tinan 2017-2018 tamba podér; 2). Diverjensia ba aplikasaun prinsipiu boa governasaun no justisa, hodi combate korrupsaun, kolusaun no nepotismu versus egoismu polítiku grupuismu no partidária, hodi defende ida-idak nia onra no dignidade política.

Ho faktus polítikus no perspetiva política ne'ebé ha'u haktuir iha leten, mak lori preokupasaun tolu ba ha'u hodi haklaken ba Sr. Primeiro Ministro no ba públiku:

1. Política hatún malu ho aktus halibur minoria sai fali maioria iha PN ho razaun konstitusional, hodi la fó biban ba partido mais votadu atu ukun, mak kuda ona preseden ida ne'ebé la furak iha prosesu konstrusaun estadu iha nasaun nurak ne'e. Nune'e, aktus hirak ne'e sei bele inspira pensamentu no asaun hosi grupu ka partido seluk, atu banati tuir hodi satan malu no hatún malu iha futuro;
2. Política satan malu no hatún malu, hamosu ona estagnasaun receitas doméstika no makroekonómiku nasaun nian iha loron ohin no ba futuro, nune'e, bele hamate dezempeñu setór privadu no empregu, hatún receitas doméstika no haboot inflasaun, haki'ik padraun moris povu nian no haboot número kiak iha ita nia nasaun;
3. Política satan malu no hatún malu, mós sei desvia pensamentu lójiku no asaun estratéjiku ukun na'in sira nian, hodi buka solusaun alternativa ba redusaun receitas petrolíferas no hasa'e receitas não petrolíferas. Basa iha parte ida, desenvolvimentu no produsaun gas iha Greater Sunrise, sei gasta osan barak iha investimento capital no despeza operacional, maibé sei hatama receitas iha tempu naruk. Iha parte seluk, produsaun gas iha Bayu Undan besik maran ona, no receitas estadu nian tun ba bebeik, nudár haktuir iha previzaun receitas livru panorama pájina 14, versaun Tetum.

Bazeia ba perspetiva política no preokupasaun hirak ne'e, ha'u iha pergunta hat ba Señor Primeiro Ministro:

1. Bainhira los mak Señor Primeiru Ministru hamutuk ho líder órgaun sira seluk, bele rezolve empasse polítiku ho dimensaun vertical no horizontal, ne'ebé hatur nasaun iha incerteza nia laran?;
2. Bainhira los mak señor Primeiru Ministru atu hatur loloos, ita bot nia governasaun ho plenu poderes hodi viabiliza política nasaun nian, atu kompleta membru governu inkompletu tuir lei orgániku governu nian?;
3. Sera ke Señor Primeiru Ministru atu kontinua de'it, ita bot nia governasaun ho ministériu sein ministru, no ministru ida de'it sai ministro ba ministériu hotu-hotu?;
4. Oinsá Sr. Primeiro Ministro atu garante ba públiku kona ba dezempeñu pesoál no institucional hosi ministériu hirak ne'ebé halo knar sein ministro?;

Sr. Primeiro Ministro! ha'u konsiente katak, governu sei la hatán hotu ha'u nia pergunta hirak ne'e, hanesan hatudu ona iha debate OGE 2018, maibé ha'u nudár representante povu no hosi partido opozisaun, ha'u hala'o de'it ha'u nia devér hodi hatutan povu nia halerik, no sensibiliza governu ba preokupasaun no nesidades povu no nasaun nian.

Obrigadu.

Dili, 10 de Dezembru 2018

Adriano do Nascimento, S.Pd.,MM
Vice Chefe Bancada Partido Democrático